



KEMENTERIAN PERPADUAN NEGARA

TEKS UCAPAN

**YB DATUK AARON AGO DAGANG
MENTERI PERPADUAN NEGARA**

SEMPENA

**MAJLIS PERASMIAN SAMBUTAN HARI WILAYAH
PERSEKUTUAN HARMONI TAHUN 2025**

15 FEBRUARI 2025 (SABTU)

8.00 MALAM

DATARAN MERDEKA, KUALA LUMPUR

Salam Perpaduan, dan Salam Malaysia MADANI.

Terima kasih kepada pengacara majlis.

SALUTASI

**(salutasi terkini akan dikemukakan kemudian)*

PENDAHULUAN

1. Terlebih dahulu, saya ingin mengucapkan **Selamat Menyambut Hari Wilayah Persekutuan Harmoni Tahun 2025** kepada seluruh warga Wilayah Persekutuan Kuala Lumpur, Putrajaya dan Labuan.
2. Pelaksanaan Sambutan Wilayah Persekutuan Harmoni ini selari dengan objektif **Minggu Keharmonian Antara Penganut Agama Sedunia yang disambut pada setiap minggu pertama bulan Februari**. Tujuan utama Sambutan Minggu Keharmonian ini adalah bagi menggalakkan interaksi dan persefahaman antara penganut agama bagi memupuk sikap toleransi serta mengukuhkan perpaduan dan keharmonian dalam kalangan masyarakat.
3. Saya juga ingin mengambil kesempatan ini untuk mengucapkan terima kasih kepada Menteri di Jabatan Perdana Menteri (Wilayah Persekutuan), Yang Berhormat Dr. Zaliha binti Mustafa kerana telah membuka peluang kepada

Kementerian Perpaduan Negara bersama-sama **meraikan detik-detik perpaduan (*moment of unity*)** bersama-sama seluruh rakyat Malaysia pada malam ini.

KONSEP FAHAM, HORMAT DAN TERIMA

Hadirin yang dihormati sekalian,

4. Kementerian Perpaduan Negara telah memperkenalkan tema **Harmoni Dalam Kepelbagaian dan Inisiatif Harmoni MADANI** yang bertujuan untuk memperkukuh keharmonian antara masyarakat pelbagai kaum dan penganut agama di Malaysia.
5. Inisiatif ini dilaksanakan dengan mengetengahkan konsep **Faham, Hormat, dan Terima**, yang menjadi asas integrasi nasional untuk mempromosikan pemahaman dan penghormatan terhadap kepelbagaian budaya dan agama di negara kita. Inisiatif ini diyakini mampu meningkatkan perpaduan dan integrasi nasional berteraskan **Perlembagaan Persekutuan dan Rukun Negara**.
6. **Salah satu cabaran terbesar yang kita hadapi ialah kelompangan kefahaman masyarakat mengenai kepelbagaian agama dan budaya.** Isu ini sering menjadi punca salah faham dan pembentukan persepsi negatif

terhadap etnik dan agama yang berbeza. Persepsi yang negatif ini bukan sahaja menjejaskan hubungan antara kaum, tetapi juga memburukkan lagi perasaan curiga dan ketegangan dalam masyarakat.

7. Oleh itu, amatlah penting untuk kita semua menyedari bahawa **peningkatan kefahaman mengenai agama dan budaya pelbagai etnik harus menjadi salah satu agenda utama kita**. Ini bukan sahaja perlu diterapkan dalam kalangan masyarakat bandar, tetapi lebih penting lagi di kawasan luar bandar yang mungkin masih terdedah kepada kekurangan pengetahuan mengenai kepelbagaian ini.
8. Selain itu, **setiap lapisan masyarakat perlu lebih cakna dan peka terhadap kepelbagaian yang ada dalam kalangan kita**. Kita perlu memahami dan mengiktiraf bahawa setiap agama dan budaya mempunyai nilai dan keindahannya yang tersendiri. **Kepelbagaian ini bukanlah halangan, sebaliknya ia adalah peluang bagi kita untuk meraikan keunikan setiap bangsa dan agama dalam masyarakat kita.**

PERARAKAN HARMONI 2025

Hadirin yang dikasihi sekalian,

9. Saya telah dimaklumkan sejak pagi tadi, pelbagai program telah dilaksanakan di sekitar Dataran Merdeka ini dan penglibatan masyarakat setempat adalah amat menggalakkan.
10. Sebagai tambahan kepada kemeriahan pada hari ini, **Kementerian Perpaduan Negara akan mempersembahkan pertunjukan kereta berhias iaitu Perarakan Harmoni yang melibatkan sepuluh (10) kaum di Malaysia antaranya Melayu, Cina, India, Sarawak, Sabah, Orang Asli, Baba dan Nyonya, Chetti, Siam dan Jawa.**
11. Setiap etnik ini akan mempertunjukkan elemen pakaian tradisional, alat muzik tradisional, tarian tradisional, serta kereta dihiaskan dengan seni bina dan seni lukis kaum masing-masing.
12. Saya berharap, **acara yang indah ini dapat dijadikan sebagai satu peristiwa tahunan yang dinantikan oleh semua lapisan masyarakat. Melalui perarakan kereta harmoni ini, kita bukan sahaja dapat mempromosikan perpaduan antara kaum, tetapi juga menjadikannya**

sebagai salah satu daya tarikan pelancongan yang dapat mempamerkan kekayaan budaya Malaysia kepada dunia.

13. Kita mempunyai pelbagai tradisi, pakaian, muzik, dan tarian yang menggambarkan kekayaan warisan negara kita. Inilah masanya untuk kita menyatukan semua ini dalam satu platform yang dapat dilihat dan dihargai oleh semua.
14. Saya menyeru kepada semua sektor, terutamanya pihak korporat dan swasta, untuk terus komited dalam melaksanakan program Tanggungjawab Sosial Korporat (CSR) yang dapat memperkasakan perpaduan negara. Bersama-sama, kita mampu mencipta masa depan yang lebih cerah dan harmoni untuk negara kita.

PENUTUP

Hadirin yang dihormati sekalian,

15. Sebelum saya mengakhiri ucapan, izinkan saya merakamkan ucapan syabas dan tahniah kepada seluruh jawatankuasa dan semua pihak yang terlibat secara langsung atau pun secara tidak langsung di atas penganjuran program Perarakan Harmoni ini khususnya Kementerian Perpaduan Negara dan Jabatan Wilayah Persekutuan.

16. Akhir kata dari saya, kita sebagai rakyat Malaysia hendaklah sentiasa bersatu hati dalam memperkukuhkan hubungan di antara kaum seterusnya mewujudkan masyarakat yang penuh harmoni.

Sekian, terima kasih.